



Anna Wangenheim
Inatsisartunut ilaasortaq, Demokraatit

Sakkutuujusussaanermut misilitsinnermut atatillugu ilinniagaqarnersiutit pillugit § 37 naapertorlugu apeqqutip nr. 85-2021-p akineqarnera.

13-07-2020
Suliap nr. 2021 - 12734
All. nr. 17242666

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Asasara Anna Wangenheim,

Inatsisartut suleriaasiat naapertorlugu apeqqutinnut qujanaq. Apeqqutigineqartut tullinnguuttuni akissuteqarfigissavakka.

Apeqqut 1: Naalakkersuisut nalilerpaat, ilinniagaqarnersiutit pillugit Namminersorlutik Oqartussat nalunaarutaat nr. 9 19. juli 2017-imeersoq aamma ilinniagaqarnersiutit pillugit Inatsisartut inatsisaat nr. 12 22. november 2011-imeersut sakkutuujusussaatitaanermut misilitsinnermut atasumik Namminersorlutik Oqartussat angalanernut angalanermullu atatillugu aningaasartuutinik tapiinissamut periarfissiisut?

Akissut:

Ilinniagaqarnersiutit pillugit Inatsisartut inatsisaat nr. 12, 22. november 2011-imeersumi § 6-imi aalajangersarneqarpoq (ilinniagaqarnersiutit pillugit inatsit), ilinniagaqarnersiutisisoqartarpoq ilinniartunut ilinniagaqarnissamut piareersarluni ilinniakkanik, inuussutissarsutitut tunngaviumik ilinniakkanik imaluunniit ingerlaqqiffiumik ilinniakkanik ingerlatsisunut, ilinniagaqarnersiutisijaqaataasinnaasut akuerineqarsimappat. Taamaalluni ilinniagaqarnersiutit taamaallaat tunniunneqartarput, ilinniarnertit oqaatigineqartut ilaat pineqarpat aamma nalinginnaasumik tapiiffigineqarsinnaasunut, tak. ilinniagaqarnersiutit pillugit inatsimmi § 8, imaluunniit ilinniakkamut pineqartumut ilinniagaqarnersiutinik tunniussiniarluni ataasiakkaat tunngavialugit aalajangertoqarpat, tak. ilinniagaqarnersiutit pillugit inatsimmi § 12.

Kisinni § 8 imaluunniit § 12 malillugit ilinniagaqarnersiuteqarnermut tunngaviuvoq, ilinniagaqarnersiutit pillugit inatsimmi isumagineqartut tunngavialugit ilinniarnep pineqarpat.

§ 6-imut nassuiaatini takuneqarsinnaavoq, oqaaseq "ilinniakkat" eqqarsaatigalugu, tamassumunnga tunngatillugu imatut paasineqassaaq aqqissuussaasumik ilikkagaqariartorneq universitetini, atuarfinni ilinniarniluunniit taakkununnga assingusuni nunap ilinniagaqarnermut aqqissuussinerani naammassinnissamut piumasaqaataasut, aammalu ilimagineqarluni ilinniartup tunngaviumik pisinnaasaanut

tapersiissasoq. Taamaalilluni sakkutuujuffissami atuunneq ilinniagaqarnersiutit pillugit inatsimmi isumagineqartut tunngavigalugit ilinniarnertut isigineqanngilaq. Tamanna tunngavigereerlugu, sakkutuujuffissami atuunnermut matumani ilanngullugu sakkutuujusussaataaernermit misilitsinnermut atatillugu angalanermit qanorluunniit ilinniagaqarnersiutit tunniunneqarsinnaanngillat.

Tassunga tapersiullugu oqaatigineqarsinnaavoq ilinniakkanut Kalaallit Nunaata avataani ingerlanneqartunut tapiiffigineqarsinnaaneq eqqarsaatigalugu, tamanna ilinniagaqarneq pillugu inatsimmi § 8-mi aaqqiiffigineqartarmat. Ilinniagaqarnersiutit pillugit inatsisip § 8, imm. 1, immikkoortoq 1-imi takuneqarsinnaavoq, ilinniagaq Danmarkimi Ilinniartitaanermit ministeriaqarfimmit tapiiffigineqarsinnaasutut akuerineqarsimasoq ilinniagaqarnersiutinut tunngatillugu aallaaviatigut Kalaallit Nunaanni Namminersorlutik Oqartussanit aamma tapiiffigineqarsinnaasoq Qallunaat naalagaaffiata ilinniagaqarnersiutinut (SU) malittarisassaani sakkutuujuffissami atuunneq ilaanngimmat, sakkutuujusussaataaneq kalaallit ilinniagaqarnersiutaanni malittarisassaanni aamma tapiiffigineqarsinnaatitaanngilaq. Sakkutuujuffissami atuunnermit atatillugu misilitsinnermit tamanna aamma atuuppoq.

Tamatuma saniatigut ilinniagaqarnersiutit pillugit inatsimmi § 8, imm. 3, nr. 3-mi takuneqarsinnaavoq, Danmarkimi ilinniagaqarneq allakkut Naalackersuisut akuerisinnaagaat soorlu ilinniagaqarnersiuteqarfigisinnaasatut Ilinniartitaanermit ministeriaqarfimmit akuerisaanngitsoq, ilinniagaq ilaatigut Kalaallit Nunaanni suliffeqartitsisinnaasutut naatsorsuutigineqarpat Ilinniakkanut ilinniagaqarnersiutinik periarfissalinnut tunngatillugu nalinginnaasumik tapiiffigineqarsinnaanngitsunut taamaaqataanik atuuppoq, pissutigalugu ilinniagaqarnersiutit pillugit inatsimmi § 12, imm. 1, nr. 1-imi takuneqarsinnaammat, Kalaallit Nunaata ilinniakkamik pineqartumik ilinniarsimasut pisariaqartissagai piumasaqaataasoq.

Aalajangersakkat oqaatigineqartut ilinniagaqarnersiutinik tigusisarnermut tunngatillugu qitiulluinnarput ilisimasaqalerusunermik pikkorissuseqarusunnerlu pillugit apeqqutinut kaalaallit suliffeqarfiini piumaneqartunut pingaaruteqarlunnartumik attuumassuteqarpoq.

Sakkutuujuffissami atuunneq imminermi ilinniarnivimmut ilaanngimmat tak. ilinniagaqarnersiutit pillugit inatsimmi § 6, ingerlaavartumik tapiiffigineqarsinnaasutut akuersissutiginnisaanut periarfissaqanngilaq. Tassunga ilaavoq kalaallit suliffeqarfiini sakkutuujuffissap atuunnerata ingerlanerani aalajangersimasumik piumaneqartanngimmat.

Apeqput 2: Naalackersuisut suli siunertaraat, kalaallit inuusuttut sakkutuujusussaataaernermit misilitsinnissamut angalanermit ineqarnermullu akiliunneqarsinnaasut?

Akissut: Ilinniagaqarnersiutit pillugit inatsimmi akuerineqarsinnaanngitsumik Naalackersuisut malittarisassanik aalajangersaasinnaanngillat, tak. apeqqutip nr. 1-ip akinerani tamanna pillugu allanneqartut. Sulianut ilinniarnertut isigineqarsinnaanngitsunut ilinniagaqarnersiutit pillugit nalunaarutitut ilusilimmik malittarisassanik tamanna pillugu aalajangersaasoqarsinnaanngilaq. Taamaattumillu

aamma sakkutuujusussaatitaanermut misilitsinermut atatillugu ilinniagaqarnersiutit pillugit malittarisassanik aalajangersaasoqarsinnaanani.


Apeqqut 3: Eqqartukkamut tunngasunik allanik soqutiginaatilinnik Naalackersuisut paasissutissiisinnaappat?

Akissut: § 37 naapertorlugu apeqqutip nr. 070-2021-p akineqarnerani aamma allanneqartut, kalaallit ilinniagaqartut soorlu ilaatigut aamma "Sunngu"-mi atuarneqarsinnaasut, elektrikeritut, mekanikeritut il.il. qallunaat illersornissaqarfiani ilinniarnerminnut atatillugu Danmarkimut angalanertik aammalu naammassillutik ilinniagaqareermik kingorna angalanerminnut akiliunneqarsinnaapput tak. Ilinniagaqarnersiutit pillugit nalunaarummi aamma tassani § 35, imm. 1-imi, imm 1 aamma § 35, imm. 2 Tassani pineqartut tassaapput ilinniakkat kalaallit Nunaanni sakkutuujunngitsunut aamma atorneqarsinnaasut.

Taamatut akissuteqaammi taaneqartut takuneqarsinnaavoq, ilinniagaqarnersiutitik imatut ilusilinnik akiliuteqarnissamut aamma periarfissaqarpoq, angalanermi aningaasartuutit pisariaqartut tamakkiisumik matussusernerinut aamma ilinniarnernut taamaattunut atatillugu najugaqarnermi aningaasartuutitut pisariaqartunut tapiissuteqarnerit, tassalu imaappoq ilinniakkamut pineqartumut isersinnaajumalluni tiguneqarneqarnissamut misilitsineruppat.

Eqikkarlugu oqaatigineqarsinnaavoq, ilinniagaqarnersiutini pineqarmat nunaqavissunik sulisussanik piukkunnaateqartunik kalaallit inuiaqatigiit pilersorneqarnissaat.

Inussiarnersumik inuulluaqqusillunga



Peter Olsen